

21/03/1998

Suharto lawan tarik tali dengan IMF

PRESIDEN Suharto membentuk regunya sendiri untuk memimpin Indonesia menangani krisis ekonomi yang paling serius dan belum pernah dihadapi negara itu sejak beberapa dekad lalu. Kabinet baru Suharto antaranya termasuk anak perempuannya sendiri dan sahabat karibnya Bob Hassan yang berketurunan Cina. Inilah kali pertama seorang keturunan Cina dilantik dalam Kabinet. Inilah juga kali pertama anak perempuan Suharto sendiri dilantik sebagai menteri Kabinet.

Adakah Kabinet baru ini mampu mengatasi kemelut ekonomi Indonesia? Suharto kini nampaknya bermain tarik tali dengan IMF. Suharto keberatan melaksanakan sepenuhnya saranan IMF yang menurutnya berlawanan dengan perlembagaan negara. IMF pula memberi amaran jika Suharto tidak melaksanakan sepenuhnya syarat perjanjiannya, pertolongan itu akan ditunda bahkan akan ditarik balik. Tetapi IMF sendiri menghadapi tekanan terutama dari Australia supaya bertolak ansur dan tanda-tanda awal menunjukkan IMF akan berlembut terutama dalam isu seperti subsidi untuk bahan makanan, minyak makan dan minyak tanah.

Bagaimanapun, pembentukan Kabinet yang diumumkan kelmarin masih diragukan keberkesannya untuk meyakinkan pelabur asing dan kepada nilai rupiah. Antara negara Asean, Indonesia adalah paling mendapat perhatian dunia kini. Presiden Clinton mengiriskan utusannya sendiri untuk memujuk Suharto supaya melaksanakan sepenuhnya syarat IMF. Perwakilan Kesatuan Eropah (RU) juga datang ke Jakarta dan kelmarin Perdana Menteri Jepun menemui Suharto. Berita asing menyatakan mereka masih tidak dapat meyakinkan Suharto untuk mematuhi sepenuhnya arahan IMF.

Di tengah gelora bantahan rakyat terhadap Suharto yang dipersalahkan kerana kegawatan ekonomi negara sekarang, terdengar juga suara rakyat membantah campur tangan IMF yang mempunyai agenda tersembunyi untuk menjajah Indonesia. Barangkali Suharto bermaksud menguji IMF: Sejauh mana IMF berhasrat memaksakan kemahuannya kepada Indonesia? Sekiranya IMF berkeras, adakah pihaknya bersedia ekonomi dan sosial yang bahangnya akan menjejaskan kestabilan negara rantau ini malah menggegarkan kestabilan seluruh dunia? Indonesia mempunyai penduduk seramai 200,000 juta, yang keempat besarnya di dunia. Kedudukannya yang strategik adalah jambatan tanah besar Asia dan Australia. Ia adalah suatu kuasa rantau Asia Tenggara.

Dalam zaman kekuasaan Sukarno, Indonesia menjadi masalah kepada kuasa Barat. Sukarno menjalankan dasar berkecuali antara kuasa Barat dan kuasa komunis. Amerika pula membentuk SEATO atau Pertubuhan Perjanjian Asia Tenggara untuk membendung pengaruh Soviet dan China di Asia Tenggara, Sukarno tidak menyertai pertubuhan itu. Akhirnya pertubuhan itu gagal kerana rangkaian pertahanan yang diwujudkan Amerika Syarikat terputus tanpa sambungannya hingga ke Australia.

Indonesia mempunyai sejarah menentang penjajahan sejak rantau ini mula dijajah oleh kuasa Barat. Belanda menjajah Indonesia selama 300 tahun. Peradaban rakyat Indonesia melahirkan candi Borobodur dan Perambanan di Jawa Tengah.

Sejak mencapai kemerdekaan, Indonesia tidak pernah kenal aman. Hanya dalam zaman pemerintahan Suharto, ia dapat menikmati keamanan untuk memberi kesempatan kepada pembangunan ekonomi. Pemberontakan demi pemberontakan berlaku sebaik mencapai kemerdekaan yang umumnya mendapat sokongan kuasa asing. Mula-mula Belanda walaupun menyerah kalah namun

membantu pemberontakan golongan tertentu di kepulauan Maluku, sesudah itu pemberontakan Darul Islam di Jawa, pemberontakan memisahkan Sumatera dari kerajaan Pusat yang didukung oleh Amerika dan akhir sekali pemberontakan PKI yang membawa kepada kejatuhan Sukarno dan kemunculan Suharto.

Yang demikian kegawatan ekonomi sekarang adalah satu detik lagi dalam rentetan gelora yang pernah dilalui Indonesia sejak merdeka. Sekalipun Indonesia membangun pesat di bawah pemerintahan Suharto tetapi diakui juga kemakmuran itu masih belum dapat dinikmati seluruhnya oleh lapisan masyarakat. Kemiskinan masih mencengkam rakyat terutama di desa. Tetapi tidak dinafikan pembangunan yang dibawa Suharto sejak berakhir era Sukarno.

Sejauh ini kita belum membaca sebuah tulisan pun dalam media Barat yang cuba memahami sebenarnya masalah yang dihadapi Indonesia. Apa yang kita baca ialah masalah kegawatan ekonomi Indonesia hanya dapat diselesaikan jika Suharto diganti oleh orang lain dan kaum keluarganya disingkirkan daripada menguasai kekayaan negara. Adakah penyelesaian kegawatan ekonomi Indonesia semudah itu? Adalah jelas Suharto menjadi sasaran utama media asing sebagaimana pada suatu waktu lalu Dr Mahathir di Malaysia menjadi sasaran mereka. Di sebalik suara daripada sesetengah kalangan politik Indonesia sendiri meminta Suharto melepaskan jawatannya, kini kita mulai mendengar suara yang semakin nyaring menyebut maruah bangsa Indonesia sedang diperkosa oleh IMF. Adakah suara ini yang didengar Suharto mendorongnya untuk bermain tarik tali dengan IMF?

(END)